

REGIONAL NEWS

HEADLINES:-

1. July ni 1 atanga hman ñan tura sawrkar laipuiin dan thar a siam New Criminal Laws of India 2023 hmang turin Mizoram a inpeih tawh .
2. Indian Metereological Department Aizawl Center chuan kumin hian Mizoramin ruahtui a dawng tam dawna hmuh a nih thu a sawi.
3. Bangladesh Prime Minister Sheikh hasina leh Prime Minister Narendra Modia te chu vawiin khan New Delhi-a Hyderabad House ah an inkawm.
4. Union Ministry of education chuan National Testing Agency (NTA) in exam felfai leh dik taka a kalpui theih nan High-Level Committee of Experts a din.

<><><>

NEW CRIMINAL LAWS

July ni 1 atanga hman ñan tura sawrkar laipuiin dan thar a siam New Criminal Laws of India 2023 hmang turin Mizoram a inpeih tawh a, Vantlang tana hnathawh hmanga inhremna a awm tawh dawn.

Mizoram Law College-a Assistant Professor Dr Maria Lalrinmawii sawi danin he dan tharin a tum ber chu dan hman lai mek chuan tunlai thiamna leh hmasawn mekna a pha tawhlo a, churang chuan he dan thar hnuaiah hian pawikhawihna thenkhat hremna tihsan a, harsatna ñhenkhat thuneihna in a huam chin tih chian leh dan bung leh chang hman tlak tawhloh paih te a ni.

Dr Maria Lalrinmawii sawi danin IPC tih thin chu Bharatiya Nyaya Sanhita (BNS) 2023 tih a ni dawn ta a, CRPC chu Bharatiya Nagarik Suraksha Sanhita (BNSS) ni tawhin Indian Evidence Act ni ñthin chu Bharatiya Sakshya Adhinyam (BSA) a ni tawh dawn bawk.

Law College Asst Professor sawi danin he dan tharah hian hmeichhia leh naupang chung a pawikhawihna hremna a awm belh a, Penal Code mi hrem theih nana hmasa ber atan Vantlang hnathawh a dah thar a, A hmaa IPC ni thin nena danglamna lian zualah dan bawhchhiatna jail tan theihna chi 33 a awm belh a, heng bakah hian dan bawhchhiatna sum leh pawisa chawitir theihna chu 83 in a tam zawk a ni.

Dr Maria Lalrinmawii chuan Dan tharah hian vantlang tana hnathawh chu hmun tam takah an rawn pe tawh dawn a ti a, a bik takin zuruih avanga buaina siam te leh vantlang tana hnawhsaka awm te hrem thin an ni dawn a, he dan thar hnuaiah hian a huhoa mi khawih Mob Lynching chu a tlem berah kum 7 tal tan theih turin dah a ni tih sawiin bul tumtu nih kher loh pawhin inhnammawih vangin a tan theih tih a sawi.

Asst Professor chuan dan thar tha tak tak hmang tangkai theitu chu mipuite an ni tih sawiin mipuite hamthatna atana dan siam anih ang ngeia hman tangkai a pawimawh a ti a, mipuiten an ngaihven a pawimawh a ti bawk.

Hetihlai hian, Excise & Narcotics Department chuan tunhnai atang khan zu avanga dan bawhchhia an man court-in thiam loh a chanter thenkhatte chu vantlang hna an thawhtir thin a.

Excise & Narcotics tarlan danin, vantlang hmuna zu rui leh midang tana buiana siam, court in thianloh a chanter thenkhat chu Mizoram Liquor (Prohibition) Act, 2019 tlawhchhanin venhima hnuaiah jail tan tir loin, vantlang hna thawhtir thin an ni. Court in a rel angina ni hnih thum velte vantlang hna thawh tir an ni a, an thawh zawhah hawin, a tukah an in report leh thin. Dan chuan ni khatah darkar 12 aia rei lo thawhtir tur a ti a, a tlangpuiin darkar 2-3 vel thawhtir an ni thin. Zu vanga man vantlang hna thawhtir hi kalpui chhonzawm zel tum a ni.

<><><>

INTER MINISTERIAL TEAM

Cyclone Remal avanga Mizoram hmun hrang hranga chhiatna thleng endik tura Sawrkar laipuiin a ruat, 'Inter-Ministerial Central Team' ten Sairang, Sairang Dinthar leh Sihhmui a tui lian vanga chhiatna hrang hrang an endik tan.

Central Team te hi nimin khan Mizoram lo thlengin tlaiah Sairang leh Sihhmui a chhiatna thlen dan an enfiah nghal a, Mizoram sorkar aiawhte leh Sihhmui VC hruaituten an tawiawm a ni.

Inter-Ministerial Central Team-te hi karleh thawhlethni June ni 25 thleng an cham ang a, an cham chung hian Greater Aizawl Water Supply Scheme Phase I & II, Melthum/Hlimen leimin te, Kulikawn leh ITI veng thlanmual te, ZMC Falkawn leimin hlauhawm lai te, Aizawl - Aibawk - Darlung inkar kawng te, Durtlang leh Kanan veng thlanmual te leh Zawlpui zau, Serchhip te an tlawh dawn a ni.

<><><>

WEATHER FORECAST

Indian Metereological Department Aizawl Center chuan kumin hian Mizoramin ruahtui a dawng tam dawna hmuh a nih thu a sawi.

IMD Aizawl Centre Director Sudheer Kumar Dwivedi-a chuan kumin chung hriat theih chinah nikum nena khaihkhinin ruahtui mm 100 velin a tla tam zawk a, Kumin January thla atanga June thla thleng khan Mizoram pumah ruahtui milimeter 620 dawn a tla tawh a, a hun chung inangah nikum khan ruahtui milimeter 600 vel a tla thung a ni.

District mala chhut chuan Kolasib chu ruahtui pun nasat berna hmun niin, January atanga June thleng khan milimeter 1111 vel a tla tawh a, nikum khan a hun chung inangah ruahtui milimeter 684.30 a tla thung.

Champhai District chu ruahtui tlak tlemna hmun ni thungin, kuminah milimeter 185 chauh a la tlak laiin nikum khan milimeter 440 a tla thung a ni.

Khawvel sik leh sa inthlak danglam nasa leh boruak lum chho zelah Mizoram pawhin kawng hrang hrangin a tuar chho ve a, global warming in a nghawng langsar zingah ruahsur dan hi a tel a, hmun hrang hranga ruahtui tlak dan a danglam nasa hle a, a thenah nasa taka a sur laiin, thenkhatin ruahtui an hmu tlem em em thung a, a sur danah pawh hmun thenkhatah a sur miah loh laiin hmundangah chuan a tla tam chi, leilung pawhin a tawrh phah theih hial khawp te in hmun thenkhatah a sur thin a ni.

<><><>

FREE CLINIC

Central YMA leh Mizoram Chemist & Druggist Association tangkawp chuan vawiin khan Tawngtai Bethel Camping Centre (TBCC), Sakawrtuichhun-ah medical health camp an buatsaih.

TBCC-a medical health camp-ah hian doctor 11, Mizoram Synod hnuaia missionary nurse thawk mek, medical refresher course training lai mi 10, Aizawl Hospital atangin Ophthalmic Assistant 3 ten tlawmngaiin damlote hriselna dinhmun an endik a, Mizoram Chemist & Druggist Association ten damlo te eitur Nuai 5 man vel an tum bawk a ni.

Tun dinhmunah Tawngtai Bethel Camping Center-ah hian mi 1211, hmeichhia 142, mipa 973 an awm mek a ni.

<><><>

MOBILE LOK ADALAT

Mizoram State Legal Service Authority ruahmanna angin vawiin khan District Legal Service Authority Serchhip chuan Thenzawl West Vc House, Bazar vengah Mobile Lok Adalat a buatsaiha, he Mobile Lok Adalat ah hian Pi Josangzeli Tlau MJS,Secretary District DLSA leh athawhpuite bakah Concillator Pahnih an tel a ni.

Mobile Lok Adalat ah hian Bank Loan puk rulh loh chungchang ah thubuai 16 ziahluh a ni a. Heng zinga thubuai 9 chu vawiin hian chinfel a ni a, cheng nuai 26 sing 9 vel hu sum chinfel a ni.

SIALHAWK

Nizana ruah sur nasa tak avanga lei minin Sialhawk Dinthar veng motor kawngpui thlang lama in sak lai pahnih a hnawl.

Lei minin a hnawl tak hi Pu Laldawngliana in niin,luah tlak lohin lei min hian a hnawl chhe vek a. A bul chiaha Pu Lalbiakhlua in sak pawh sak chhonzawm ngam a nih tawh dawn loh avangin vawiin khan thiah nghal a ni. He chhiatna thlengah hian vanneih thlak takin thi leh hliam an awm lo.

Nizana ruah sur avang hian Sialhawk Power Sub Station panna kawngpui leh Thingaimual panna kawngpui pawh leiminin a hnawh ping vek a ni.

<><><>

PM

Bangladesh Prime Minister Sheikh hasina leh Prime Minister Narendra Modia te chu vawiin khan New Delhi-a Hyderabad House ah an inkawm. Thuchhuah intawm siamin Prime Minister Modia chuan Bangladesh chu India-in policy a siam Neighbourhood First Policy, Act East Policy, Vision Sagar leh Indo-Pacific huamchhungah hmun pawimawh tak luaktu an ni a ti a. Nikum khan ram pahnihte hian project pawimawh tak tak an thawk zo tih sawiin heng zingah hian luia inkalpawhna thui ber Ganga lui ami chu hlawhtling taka zawhfel a ni a ti bawk.

Prime Minister pahnihte an inbiak zawh hnu hian inremna thuthlung engemawzat siam a ni a, heng zingah hian digital leh green partnership, tuiptui lama venhimna te, blue economy, hriselna leh damdawi lam, vansang lam zirna, railway lam inkalpawhna, tuifinriat zirchianna, disaster management leh fisheries lamte a tel a ni.

<><><>

NTA EXPERTS COMMITTEE

Union Ministry of education chuan National Testing Agency (NTA) in exam felfai leh dik taka a kalpui theih nan High-Level Committee of Experts a din a. He committee ah hian member pasarih awmin ISRO hotu hlui Dr.K.Radhakrishnan chuan chairman niin a ho dawn a. NTA in exam a kalpui danah siamthat ngai awmte zirchiangin rawtna an siam ang. Hei bakah hian tuna lungawihlohna leh sawiselna awm mekte an zirchiang dawn bawk a. Thla hnih chungin an report hi Union Ministry ah an thehlut ang.

<><><>

RUSSIA ATTACKS UKRAINE POWER GRID

Russia chuan nizan khan Ukraine kawlphehtha siamna hmunpui nasa takin a bei a. Ukraine khawthlang lama awm Lviv khawpuiin kawlphehtha an lakna tam tak a ti chhia. He beihnaah hian hnathawk pahnihin hliam an tuar a, air defence system chuan missile 16 zinga 12 a kapthla a, hei bakah hian drone 13 kahthlak a ni bawk.

Tun tum hi thla thum chhunga Russia in Ukraine energy siamna hmun a beih tum riatna a ni a. Russia-in kawlphehtha hmunpui vawi tam tak a beih avang hian harsatna an tawh nasa hle a ni.

<><><>